

REGIONAL NEWS UNIT
ALL INDIA RADIO, AGARTALA
Date: 31-01-2026
Time: 07:35-07:40 AM Hrs
BENGALI MORNING BULLETIN

Transfer of TPS & IPS :

রাজ্য পুলিশে আইপিএস এবং টিপিএস স্তরে বদলি হলেন নয়জন অফিসার। ধলাই জেলার নতুন পুলিশ সুপার হচ্ছেন দেসাই রুশিকেশ জয়সিং। মিহির লাল দাসকে টিএসআরের প্রথম ব্যাটেলিয়ানের কমান্ডেন্টের দায়িত্ব দেওয়া হয়েছে। গোমতী জেলার অতিরিক্ত পুলিশ সুপার হচ্ছেন আইপিএস রিশভ। জ্যোতিষ্মান দাস চৌধুরীকে টিএসআর ১১ ব্যাটেলিয়ান এবং শংকর দেবনাথকে টিএসআর ১২ ব্যাটেলিয়ানের কমান্ডেন্ট'এর অতিরিক্ত দায়িত্ব দেওয়া হয়েছে। মোহনপুরের এসডিপিও হচ্ছেন আশিস দেবনাথ এবং পুলিশের স্পেশাল ব্রাঞ্চে ডিএসপি হিসেবে বদলি হলেন সব্যসাচী দেবনাথ। গতকাল সাধারণ প্রশাসন বদলির নির্দেশিকা জারি করেছে।

Ashwini Vaishnaw :

তথ্য প্রযুক্তি মন্ত্রী অশ্বিনী বৈষ্ণো বলেছেন ১৬ থেকে ২০ ফেব্রুয়ারি নয়াদিল্লিতে অনুষ্ঠিত হতে যাওয়া ভারত-এআই ইমপ্যাক্ট সামিট ২০২৬ সমগ্র বিশ্বের মধ্যে এখন পর্যন্ত সবচেয়ে বড় এআই সামিট হতে চলেছে। গতকাল নয়াদিল্লিতে সংবাদমাধ্যমের সাথে কথা বলতে গিয়ে শ্রী বৈষ্ণো বলেন যে ১০০ জনেরও বেশি সিইও এআই ইমপ্যাক্ট সামিট-এ যোগ দিচ্ছেন। ভারত যেভাবে তার এআই ইকোসিস্টেম তৈরি করেছে তার প্রশংসা করে এটিকে উৎসাহব্যঞ্জক বলে অভিহিত করেছেন তিনি।

Amit Sah :

কেন্দ্রীয় স্বরাষ্ট্রমন্ত্রী অমিত শাহ আসামের ডিব্ৰুগড় জেলায় উদ্বোধন ও ভিত্তিপ্রস্তর স্থাপনের পর ধেমাজি জেলায় তাকাম মিসিং পোরিন কেবাং যুব উৎসবে প্রধান অতিথি হিসেবে যোগ দেন। অনুষ্ঠানে উপস্থিত ছিলেন মুখ্যমন্ত্রী হিমন্ত বিশ্ব শর্মা এবং কেন্দ্রীয় বন্দর, জাহাজ চলাচল ও জলপথ মন্ত্রী সর্বানন্দ সোনোয়াল। কেন্দ্রীয় মন্ত্রী মিসিং সম্প্রদায়ের সংস্কৃতি এবং প্রকৃতি সংরক্ষণের জন্য তাদের কাজের প্রশংসা করেন। স্বরাষ্ট্রমন্ত্রী জানান যে এই সম্প্রদায়ের যুবকদের জন্য শীঘ্রই একটি বিশেষ নিয়োগ অভিযান শুরু করা হবে।

Bishramganj Panchayet :

নব গঠিত বিশ্রামগঞ্জ নগর পঞ্চায়েতের এগজিকিউটিভ অফিসারের দায়িত্ব পেলেন বিশালগড়ের এসডিএম বিষ্ণু সাহা। নগর পঞ্চায়েতটির ডেপুটি এগজিকিউটিভ অফিসারের দায়িত্ব পেলেন বিশালগড় মহকুমা শাসক অফিসের ডেপুটি কালেক্টর প্রসেনজিত দাস।

Nirmala Sitharaman :

২০২৬-২৭ সালের কেন্দ্রীয় বাজেট উপস্থাপনের পর অর্থমন্ত্রী নির্মলা সীতারমন দেশের বিভিন্ন অঞ্চলের প্রায় ত্রিশ জন কলেজ ছাত্রের সাথে মতবিনিময় করবেন। এই উদ্যোগের অংশ হিসেবে, কলেজ ছাত্ররা লোকসভা গ্যালারি থেকে কেন্দ্রীয় বাজেটের সরাসরি উপস্থাপনা প্রত্যক্ষ করার সুযোগও পাবে। এই উদ্যোগের লক্ষ্য হল শিক্ষার্থীদের মধ্যে অর্থ, অর্থনীতি, শাসন এবং গণতান্ত্রিক প্রক্রিয়া সম্পর্কে আরও সচেতনতা বৃদ্ধি করা।

AI Impect Summit :

আগামী ফেব্রুয়ারি মাসে নয়াদিল্লির ভারত মন্ডপমে অনুষ্ঠিতব্য ইন্ডিয়া এআই-ইমপ্যাক্ট সামিট ২০২৬ এর প্রস্তুতি হিসেবে গতকাল প্রজ্ঞাভবনে

আঞ্চলিক স্তরের এক সচেতনতামূলক কর্মশালার আয়োজন করা হয়। কর্মশালায় মুখ্যসচিব জে কে সিনহা বলেন, আসন্ন সামিটের বিষয়ে সকলকে সাম্যক ধারণা দেওয়ার লক্ষ্যে এই কর্মশালার আয়োজন করা হয়েছে। এই কর্মশালার মাধ্যমে অংশগ্রহণকারীরা কৃত্তিম বুদ্ধিমত্তার প্রয়োগের ক্ষেত্রে আরও সমৃদ্ধ হবেন বলে তিনি আশা প্রকাশ করেন।

PM Poshan :

প্রধানমন্ত্রী পোষণ প্রকল্পের আওতায় সামাজিক নিরীক্ষা সংক্রান্ত এক দিনের কর্মসূচি গতকাল উদয়পুরে অনুষ্ঠিত হয়েছে। রাজর্ষি কলক্ষেত্রে আয়োজিত অনুষ্ঠানে উপস্থিত ছিলেন গোমতী জিলা পরিষদের সভাপতি দেবল দেবরায়। অনুষ্ঠানে বিভিন্ন স্কুলের মিড ডে মিল প্রকল্পের স্বচ্ছতা ও কার্যকারিতা নিয়ে বিস্তারিত আলোচনা করা হয়।

Child Marriage Free India :

জিরানীয়া চাইল্ড ডেভেলপমেন্ট প্রজেক্ট অফিসারের কার্যালয়ের উদ্যোগে গতকাল জিরানীয়া পঞ্চায়েত সমিতি হলে বাল্যবিবাহ মুক্ত ভারত প্রচার অভিযানের অঙ্গ হিসেবে এক সচেতনতামূলক কর্মসূচি অনুষ্ঠিত হয়। অনুষ্ঠানে জিরানীয়া পঞ্চায়েত সমিতির চেয়ারম্যান প্রীতম দেবনাথ বলেন, বাল্যবিবাহ আজও সমাজের এক গভীর ও উদ্বেগজনক সমস্যা। এই কু প্রথাকে ত্বণমূল স্তর থেকে নির্মূল করতে হলে সমাজের সকল অংশের জনগণকে ঐক্যবদ্ধভাবে এগিয়ে আসতে হবে।

Suklacharan Noatia :

গতকাল বিলোনিয়ায় বিলোনিয়া প্রাইমারি মার্কেটিং কো-অপারেটিভ সোসাইটির বার্ষিক সাধারণ সভা অনুষ্ঠিত হয়। সভার উদ্বোধন করেন সমবায় মন্ত্রী শুক্লাচরন নোয়াতিয়া।

Bikash Debbarma :

জনজাতি কল্যাণ মন্ত্রী বিকাশ দেববর্মা বলেছেন যুব সমাজকে নেশার করাল গ্রাস থেকে মুক্ত করতে হলে খেলাধুলার প্রতি তাদের আকৃষ্ট করতে হবে। খেলাধুলা শরীর ও মনকে সুস্থ রাখে, পাশাপাশি জীবনে শৃঙ্খলা ও লক্ষ্যবোধ তৈরি করে। গতকাল মুঙ্গিয়াকামি দ্বাদশ শ্রেণী বিদ্যালয়ে বার্ষিক ক্রীড়া প্রতিযোগিতার উদ্বোধন করে তিনি এ কথা বলেন। বিদ্যালয়ের ছাত্রছাত্রীরা বিভিন্ন ইভেন্টে প্রতিযোগিতামূলক খেলাধুলায় অংশ নেয়।

Weather :

আজ আকাশ আংশিক মেঘাচ্ছন্ন থাকবে। সকালে হালকা কুয়াশা পড়েছে। আজ দিনের সর্বোচ্চ তাপমাত্রা ২৯ ডিগ্রি সেলসিয়াসের কাছাকাছি থাকতে পারে। আজ ভোরে সর্বনিম্ন তাপমাত্রা ছিল ১২ দশমিক ৪ ডিগ্রি সেলসিয়াস।
